

每週經課朗誦經文(巴克禮漢羅/教羅)2015/08/30

共同經課 - 1 雅歌二章八節~十三節

8 我，我所戀愛ê 聲看 ah，伊來 lah；Tiô t ī 山裡，跳 t ī 嶺裡。9 我所戀愛ê，親像羚羊á是鹿á；看 ah，伊 khi ā t ī 阮ê牆壁後；Tùi 窗á teh 看；Tùi 窗á-chí teh 探。10 我所戀愛ê出聲對我講，我所疼ê，我ê 美人，起來 kap 我相 kap 去。11 看 ah，因為冬天已經過，雨已經晴(chîⁿ)，soah lah。12 遍地ê花已經開，鳥á哮ê時到 lah；T ī 咱ê境內聽見 ka-chui ê 聲。13 無花果樹ê果子漸漸成熟，葡萄樹開花吐出伊ê芳；我所疼ê，我ê 美人，起來 kap 我相 kap 去。

共同經課 - 2 詩篇四十五篇一節~二節、六節~九節

1 K hó-láh 後裔教示ê 詩，koh 是愛慕ê 歌；交 hō 樂官；調是用「百合花」。1) 我ê 心 chhèng 出好ê 話；我講起我為 tiòh 王所做ê；我ê 舌是敏捷ê 人ê 筆。2 你比世間人 khah 好看，Tī 你ê 嘴滿滿有恩惠，所以上帝賜福你，直到永遠。6 上帝 ah，你ê 寶座是永永遠遠ê，你ê 國ê 權柄是正直ê 權柄。7 你歡喜公義，怨恨不法，所以上帝，你ê 上帝，用歡喜ê 油抹你，贏過你 chiah-ê 同伴。8 你ê 衣裳 lóng 有沒藥、沉香、肉桂ê 芳；Tùi 象牙ê 王宮，有絲絃ê 樂器 hō 你歡喜。9 有王ê cha-bó-kiáⁿ tī 你尊貴婦女ê 中間；王后用 Gô-hui ê 金裝飾，khia tī 你ê chiáⁿ-pêng。

共同經課 - 3 雅各書一章十七節~二十七節

17 見若好ê 賞賜，kap 完全ê 恩賜，lóng 是 tùi 頂面，tùi 眾項光ê 父落來。伊無變換，也無轉旋ê 影。18 伊照家己ê 意思 bat 用真理ê 道生咱，beh hō 咱 tī 伊所造ê 中間，做親像頭水ê 果子。19 我所疼ê 兄弟 ah，lín 知 chit-ê。但是 tak 人論到聽 tiòh 緊，講話 tiòh 慢，受氣也 tiòh 慢。20 因為人ê 受氣無成上帝ê 義。21 所以 lín 除去 lóng 總 am-cham，kap 過額ê 惡毒，tiòh 用溫柔來接納所眾 tī 內面ê 道理，就是能救 lín ê 靈魂ê。22 Lín tiòh 做行道理ê，m̄ 是 kan-ta 聽ê，來家己騙。23 因為聽道理，若無行ê，譬喻親像人 tī 鏡裡詳細看伊本然ê 面；24 看過了就做伊去，liám-piⁿ boē 記得伊生做甚麼款。25 但是人注神 tī hit-ê 齊全ê 律法，就是 hō 人自由ê，也長長 toà tī hit-ê，m̄ 是聽了 boē 記得ê，是實在 teh 用工ê，chit 號人 tī 伊ê 所做 beh 有福氣。26 若有人掠家己做敬虔，也無約束伊ê 舌，就是騙伊家己ê 心，chit 號人ê 敬虔是空空。27 獨獨眷顧孤兒寡婦 tī in ê 患難中，koh 家己守，無 hō 世俗 bak-tiòh，這 tī 父上帝ê 面前就是做清氣無 lâ-sâm ê 敬虔。

共同經課 - 4 馬可福音七章一節~八節、十四節~十五節、二十一節~二十三節

1 有法利賽人 kap kúi-nā ê 經學士聚集就近耶穌；in 是 tùi 耶路撒冷來，2 也 bat 看見伊ê 學生中有ê 用俗手 teh 食，就是未有洗ê 手。3 因為法利賽人 kap 眾猶太人 lóng 是拘執古早人ê 流傳；若無出力洗伊ê 手就無食；4 tùi 街市 tò 來，若無洗也無食；in 所受來執守ê iáu 有 choē-choē 項，親像洗杯、罐、銅器，hiah-ê。5 法利賽人 kap 經學士問伊講，你ê 學生無照古早人ê 流傳來行，用俗手來食是怎樣？6 伊 kā in 講，以賽亞所識語指 lín 假好ê 人真正 tiòh，照所記載講，Chit-ê 百姓用嘴唇尊敬我，但是 in ê 心離開我遠遠；7 in 敬拜我是空空，因為 in 用人所命令做教示，來教示人。8 Án-ni lín 是放 sak 上帝ê 誠命，拘執人ê 流傳。14 就 koh 叫眾人就近伊，kā in 講，Lín lóng tiòh 聽我來曉悟；15 見若 tùi 人ê 外面入ê boē 會 bak lâ-sâm 人；獨獨 tùi 人ê 內面出ê，chiah-ê 就是 bak lâ-sâm 人。21 因為 tùi 內面，就是 tùi 人ê 心，出 chiah-ê pháiⁿ 念頭，私通、偷 thèh、thài 人，22 姦淫、貪心、邪惡、奸詐、好色、pháiⁿ 目，毀謗，驕傲，猖狂；23 凡若食ê pháiⁿ lóng 是 tùi 內面出，也 bak lâ-sâm 人。